

Julevsáme mánáj láhkámtjehpudahka

- Gáktu guoradallat mánáj láhkámav?

Láhkám la vuodulasj tjehpudahka skávlán. Skávlámáná galggi sihke oahppat láhkát ja láhkát vaj oahppi. Dát dutkam galggá guoradallat julevsáme mánáj láhkámtjehpudagáv, gudi oahppi láhkát sihke julevsámegiellaj ja dárogiellaj. Láhkámdutkam vuoset máná gudi guovte gielajda oahppi láhkát, tjuovvu dav sæmme láhkámávddánimev gá avtagielak máná gánná dekávdDIM ja dádjadibme li oase láhkámis. Nanos njálmálasj giella ja báhkoboandudahka la garrasit tjanádum láhkámtjehpudahkaj, ja sierraláhkáj láhkámdádjadibmáj. Dutkama milta de galggá mánná láhkát dan giellaj majt máhtta buoremusát. Dajnas sjaddá ietjá dille gá mánáj áhpadusgiella ja vuostasjiella skávlán la ietjá giella gá mánáj sijddagiella.

Ulmme dájna dutkamijn la gávnnat gáktu julevsámegiella vájkkut mánáj láhkámav gá mánná galggá fonologasj láhkámdáses ortografalasj láhkámdássáj jáksát. Prosjæktaj gullu vil ráddjimbargo, valla dát dutkam dættot julevsáme morfologijav ja báhkostruktuvrav, mij la ájnas oasse gá galggá nanos láhkken ávddánit. Oassálasste li julevsáme máná jages 6-13, julevsámegiellajn vuostasjiellan skávlán. Prosjækta la vilá álggomutton, ja guoradallama hárráj li vil etihkalasj ássje ma viertti tjielgaduvvat ávddál materiállatjoahkkim álggá, dagu miededibme oassálasstijs ja æjgádijs, namáduvvat oassálasstijt ja gáktu materiálajt vuorkkit. Dutkamtjuolmma galggá láhkámtestaj ja giellatestaj baktu guoradaláduvvat. Gávnnuji moattelágásj láhkámtesta ma guoradalli iesjuhtik bielijt mánáj láhkámtjehpudagás. Testa ma guoski morfologijaj ja báhkostruktuvrajda li guovdátjin. Buojkulvisá li fonologasj ja ortografalasj láhkámtesta jienaj ja bágoj, morfologasj diedulasjuohta, ja dádjadibme ja báhkoboandudahka.